

Na osnovu člana 94. stav 2. Zakona o penzijskom i invalidskom osiguranju ("Službene novine Federacije BiH", broj 29/98 i 32/01), Vlada Federacije Bosne i Hercegovine na prijedlog federalnog ministra odbrane, na svojoj 110. sjednici održanoj 19. maja 2005. godine donosi

U R E D B U

O KRITERIJIMA, NAČINU I POSTUPKU

PRIZNAVANJA VREMENA PROVEDENOG U ODBRANI

BOSNE I HERCEGOVINE U PENZIJSKI STAŽ

KAO POSEBAN STAŽ

I OSNOVNE ODREDBE

Član 1.

Ovom Uredbom se utvrđuju kriteriji, način i postupak priznavanja vremena provedenog u pripremama za odbranu i odbrani Bosne i Hercegovine u penzijski staž, kao posebni staž za pripadnika Hrvatskog vijeća odbrane, Armije Republike Bosne i Hercegovine i organa unutrašnjih poslova, saglasno propisima koji su se na njih odnosili prije stupanja na snagu Zakona o penzijskom i invalidskom osiguranju.

II KRITERIJI, NAČIN I POSTUPAK IZDAVANJA

UVJERENJA O VREMENU PROVEDENOM U ODBRANI

BOSNE I HERCEGOVINE

Član 2.

Pravo na poseban staž u dvostrukom trajanju, koji se uračunava u penzijski staž, ima pripadnik Hrvatskog vijeća obrane, Armije Republike Bosne i Hercegovine, aktivnog i rezervnog sastava policije nadležnog organa unutrašnjih poslova i službenik i namještenik nadležnog ministarstva odbrane (u daljnjem tekstu: pripadnik Oružanih snaga), koji je učestvovao u odbrani Bosne i Hercegovine u periodu od 18.09.1991. godine do 23.12.1995. godine.

Član 3.

Odjel odbrane u općini, u kojem se vodi evidencija učešća u odbrani Bosne i Hercegovine lica iz člana 2. ove Uredbe, nadležan je za izdavanje uvjerenja o vremenu provedenom u odbrani Bosne i Hercegovine.

Član 4.

Uvjerenje o vremenu provedenom u odbrani Bosne i Hercegovine u periodu od 18.09.1991. godine do 23.12.1995. godine izdaje se na temelju službene evidencije.

Podaci o pripadniku Oružanih snaga, o čijem učešću u odbrani Bosne i Hercegovine u periodu od 18.09.1991. godine do 23.12.1995. godine nema službene evidencije, utvrđuju se u postupku koji se vodi po odredbama Zakona o upravnom postupku i o istim se donosi prvostupno rješenje.

Na osnovu pravosnažnog rješenja iz stava 2, ovog člana vrši se upis u službenu evidenciju i na osnovu iste izdaje se uvjerenje.

Član 5.

Uvjerenje iz člana 4. ove Uredbe izdaje se u 3 (tri) primjerka i to jedan primjerak za Federalni zavod penzijskog i invalidskog osiguranja, jedan primjerak za stranku i jedan primjerak za arhivu.

O izdatom uvjerenju vodi se evidencija.

Član 6.

U slučaju da lice izgubi ili na drugi način ostane bez uvjerenja, na zahtjev lica izdat će se duplikat uvjerenja prema evidenciji izdatog uvjerenja. Duplikat uvjerenja čuva se uz evidenciju izdatog originala uvjerenja.

III PRIJELAZNE I ZAVRŠNE ODREDBE

Član 7.

Danom stupanja na snagu ove Uredbe, prestaju da važe svi nautci o izdavanju uvjerenja o vremenu provedenom u odbrani Bosne i Hercegovine, koji su se do sada primjenjivali.

Član 8.

Federalni zavod za penzijsko i invalidsko osiguranje vrši upis posebnog staža u radne knjižice na osnovu uvjerenja iz člana 4. ove Uredbe.

Član 9.

Ova Uredba stupa na snagu narednog dana od dana objavljivanja u "Službenim novinama Federacije BiH"

V broj 282/05

19. maja 2005. godine Sarajevo

Premijer

dr. Ahmet Hadžipašić, s.r.